

Fegnameira èn 12 unfants

A parteir da glindesde passo èn total 9 unfants ainten la canorta a Savognin. Chegl vot deir tgi chels 9 èn betg adegna lò igl madem mument. En de èn chels e l'oter de igs oters. Tenor Christiana Hemmi è la fegnameira da rivar sen 12 unfants. E chegl tgi èn mintga de lò. Chegl pu dessan esser an tot 40 unfants. Dasperas la survigilaziun classica dalla canorta, ins ò a Valbel-la er oters sarvetschs scu la meisa da mezde per scolarigns da scoletta u dalla scola primara. A Savognin ins porscha er gio ossa giantar per singuls unfants da scoletta. A parteir digl settember vign er integrada ainten la canorta la gruppera da giuier. Essend tgi dat actualmaint nigna gruppera da giuier, ins ò er organiso chella e sondo igl basigns. Anfignen ossa ins vegia survagnia 14 annunzgas concretas.

Las localitads dalla canorta all'anteriora «Cantina» èn sufficiantas per piglier se mintga de 12 unfants. All'antrada agl plang-tera èn las gardarobas, la stanza da magler e la tgadafì. «La cuschigna vign fatga da tot igl personal. Ed er natager fon tottas», dei Christiana Hemmi. Agl amprem plang èn alloura las stanzas, noua tgi igs unfants cun lour survigiladras èn tranter de. Chegl èn an tot set stanzas: ena stanza da malager e zambarger, ena stanza per sa vi-stgier, ena stanza per durmeir, ena stanza da cuminanza, biro e las cumoditads.

Scu igl mument anc betg ideal ed er en po pitschen, giuditgescha la manadra igl plaz davant tgesa. Cò seia anc da cattar ena miglra schliaziun.

Uscheia è la canorta a Savognin, tgi è naturalmaint averta per igl antier Surses ed anc suror, messa sen buna veia. Davart dalla organisaziun ins è adegna premuro da migliurar la purscheida e spera tgi la canorta seia acceptada e vigna nizigeida dalla populaziun.

Digl reminent dattigl igs 26 d'avost 2015 en de dallas portas avertas tar la «Canorta Tgimirola» a Savognin.

BREV DA LECTOURS

Cumegn Surses e la democrazeia

Igs 16 d'avost è an Surses la votaziun all'urna concernent la constituzion communal. En punct am intimescha da metter en NA ainten l'urna:

Igl dretg da referendum cunter conclus dalla radunanza communal mantga ainten la constituzion. Ainten la broschura d'infurmaziun, da tot las occurrenzas d'infurmaziun ed aint igl messadi da votaziun è chel dretg da referendum cuntignia. Igl è nia declero, tgi per en cumegn da nossa grondezza fogl senn, schi la radunanza communalà relativ blera pussanza ed alloura so schi fò basigns, cun 100 sottoscripziuns neir piglia igl referendum cunter en conclus. Alloura ò igl affar da neir decidia definitiv all'urna. Ainten la constituzion actuala, ò la radunanza communalà fitg grondas cumpetenzas da decider, i so pero betg neir piglia igl referendum cunter en conclus.

Per ena votaziun all'urna imponda igl votant 5 minutas per la votaziun an scretg. Per ena participaziun alla radunanza communalà dovrà mintga votant en'antiera seira, ena seira fixada an en li defino. Blers votants savaron mintgama betg sa participar alla radunanza communalà perveia da lour labour, perveia da malsogna, causa dalla vigliadetna, perveia da schletras veias, per mancanza d'occasiun da neir agl li, perchegl tgi votan betg lascher sulets lour unfants, etc. En punct impurtant è er tgi igs abitants da Surses abiteschan sen en tratg da 32 km e chegl ainten las muntognas, noua tgi las veias son er esser schletas. Pi democratic tgi ena radunaniza communalà è ord tots chels muteivs, è ena votaziun all'urna.

Nign dretg da referendum ed a madem mument grondas cumpetenzas dalla radunanza communalà èn en avantatg per gliout, tgi vot concluder cun ena pitschna participaziun alla

votaziun grondas expensas, p. ex. tigl turissem u sen camp da construcziun. Tenor mies mein è en bung e persistent project per la nossa val pero angal chel project, tgi so sen giaveisch dalla populaziun, er reuscheir ad ena votaziun all'urna cun ena gronda participaziun alla votaziun.

Ruth Giovanoli
mastrala, Beiva

Am lubesch ena dumonda!

Rivond se digl Crap Ses, vaia obsero ena profila laziun speziala sen la planeira da Burvagl all'antrada dalla val Surses. Ia sun alloura nia infurmo, tgi igl cantun prevei da realisar lò en silo da sal per la veia cantunala. Schi bung schi dretg, uscheia en object saro da basigns. Schi ins painsa anavos, davogl eneda ena studia per realisar an chel li ena tavla u en stand d'infurmaziun per igl turissem an nossa val ena veiramaint fitg bun'ideia. Deplorabla maintng è er chella studia svaneida ainten latrocla. Chel li è u fiss an sasez fitg adatto per preschentiar agl passant la purscheida turistica an nossa val. Schi vign pero construia lò en clutger da sal, ans pigliainsa l'opziun e la pussebladad da forsa eneda tuttegna realisar en center d'infurmaziun all'antrada da Surses. Perchegl am lubeschha modestamaintng ena dumonda a noss politichers e turistichers. Èg betg pussebel da construeir chel silo oradem igl plaz (direcziun Crap Ses) u forsa perfign tar igl implant da catram sur Casti ? Ia sper tgi la instanzas cantunalas vignan er a santeir che giaveisch !

Not Spinatsch



Christiana Hemmi da Lai è manadra dalla «Canorta Tgimirola» a Savognin an en pladimaint da 30 %.



Sch'ins reiva se da Ses da vart dretga è profilo per en silo da sal per las veias. Ena tgossa tgi dat da discussiunar.